

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренцијски савјет

R J E Š E N J E
o dopuštenosti koncentracije
privrednih subjekata Agrokor d.d. Zagreb i Mercator d.d. Ljubljana

Sarajevo
juni 2014. godine



Broj: 05-26-1-014-374-II/13
Sarajevo, 10.6.2014. godine

Na osnovu člana 25. stav (1) pod e), člana 42. stav (2) i člana 18. stav (7) Zakona o konkurenciji («Službeni glasnik BiH», br. 48/05, 76/07 i 80/09) i člana 19. Odluke o načinu podnošenja prijave i kriterijima za ocjenu koncentracija privrednih subjekata („Službeni glasnik BiH“, broj 34/10), rješavajući po posebnom zahtjevu za donošenje rješenja broj: 05-26-1-014-373-II/13 od 20.5.2014. godine, podnesenog od privrednog subjekta Agrokor d.d. ,Trg Dražena Petrovića 3, Zagreb, Republika Hrvatska, zastupanog po advokatu Nihadu Sijerčiću, Trg djece Sarajeva 1, 71000 Sarajevo, Konkurencijsko vijeće je na 92. (devedesetdrugoj) sjednici održanoj dana 10.6.2014. godine, donijelo

R J E Š E N J E

1. Smatra se dopuštenom, u smislu člana 18. stav (7) Zakona o konkurenciji, koncentracija kojom privredni subjekt Agrokor d.d.,Trg Dražena Petrovića 3, Zagreb, Republika Hrvatska stiče 53,12% dionica privrednog subjekta Poslovni sistem Mercator d.d., Dunajska cesta 107, Ljubljana, Republika Slovenija.
2. Ovo Rješenje je konačno i bit će objavljeno u «Službenom glasniku BiH», službenim glasilima entiteta i Brčko Distrikta Bosne i Hercegovine.

O b r a z l o ž e n j e

Konkurencijsko vijeće je zaprimilo, dana 28.6.2013. godine, Prijavu koncentracije broj: 05-26-1-14-II/13 (u daljem tekstu: Prijava) podnesenu putem advokata Nihada Sijerčića, Trg djece Sarajeva 1, 71000 Sarajevo (na osnovu punomoći izdate dana 26.6.2013. godine u Zagrebu), po kojoj privredni subjekt Agrokor d.d. ,Trg Dražena Petrovića 3, Zagreb, Republika Hrvatska (u daljem tekstu: Podnosilac prijave ili Agrokor) namjerava steći 53,12% dionica privrednog subjekta Poslovni sistem Mercator d.d., Dunajska cesta 107, Ljubljana, Republika Slovenija (u daljem tekstu: Mercator d.d.).

Predmetna Prijava je podnesena pravovremeno, u skladu s članom 16. stav (1) Zakona o konkurenciji (u daljem tekstu: Zakon).

Prijava je zatim dopunjena podneskom broj: 05-26-1-14-1-II/13 dana 1.7.2013. godine.

Konkurencijsko vijeće je nakon uvida u dostavljenu Prijavu utvrdilo da ista nije kompletna i uredna te je zatražilo dopunu aktom broj: 05-26-1-14-2-II/13 dana 8.7.2013. godine, aktom broj:05-26-1-14-9-II/13 dana 27.8.2013. godine (Zahtjev za produženjem roka Podnosioca prijave za dostavu dopune Prijave zaprimljen pod brojem: 05-26-1-014-10-II/13 dana 28.8.2013. godine koji je Konkurencijsko vijeće ocijenilo opravdanim te odobrilo produženje roka za dostavu dopune Prijave aktom broj 05-26-1-014-11-II/13 dana 29.8.2013. godine), aktom broj: 05-26-1-14-13-II/13 dana 1.10.2013. godine, aktom broj: 05-26-1-14-15-II/13 dana 14.10.2013. godine i aktom broj: 05-26-1-14-18-II/13 dana 29.10.2013. godine.

Podnosilac prijave je predmetnu Prijavu dopunio podneskom broj: 05-26-1-14-3-II/13 dana 19.7.2013. godine, podneskom broj: 05-26-1-14-4-II/13 dana 29.7.2013. godine, podneskom broj: 05-26-1-14-12-II/13 dana 5.9.2013. godine, podneskom broj: 05-26-1-14-14-II/13 dana 8.10.2013. godine, podneskom

broj: 05-26-1-14-16-II/13 dana 22.10.2013. godine, podneskom broj: 05-26-1-14-17-II/13 dana 28.10.2013. godine i podneskom broj: 05-26-1-14-19-II/13 dana 4.11.2013. godine.

Konkurencijsko vijeće je, u skladu sa članom 16. stav (4) Zakona, dana 9. augusta 2013. godine objavilo Obavještenje o dostavljenoj Prijavi (broj: 05-26-1-14-5-II/13 od 6.8.2013. godine) u tri dnevne novine u Bosni i Hercegovini i pozvalo sve zainteresovane strane na dostavljanje pisanih komentara o namjeravanoj koncentraciji.

Na predmetno Obavještenje nisu dostavljeni komentari zainteresovanih strana.

Nakon analize podnesene Prijave i dopuna Prijave, Konkurencijsko vijeće je dana 13.11.2013. godine (akt broj: 05-26-1-14-20-II/13) Podnosiocu prijave izdalo Potvrdu o prijemu kompletne i uredne prijave, u smislu člana 30. stav (3) Zakona.

Podnosilac prijave je naveo, u smislu člana 30. stav (2) Zakona, da je podnio zahtjev za ocjenu koncentracije nadležnom tijelu Republike Crne Gore, Republike Srbije, Republike Hrvatske, Republike Slovenije, Republike Makedonije, Republike Albanije i Kosova.

Podnosilac prijave je u toku postupka obavijestio Konkurencijsko vijeće da je nadležno tijelo za zaštitu konkurencije Republike Albanije ocijenilo namjeravanu koncentraciju dopuštenom (Odluka broj: 276/3 od dana 26. jula 2013. godine), kao i nadležno tijelo za zaštitu konkurencije Republike Makedonije (Odluka broj: 08-138 od dana 12. septembra 2013. godine), nadležno tijelo za zaštitu konkurenciju Republike Slovenije (Odluka broj: 306-64/2013-73 od 22. novembra 2013. godine) i nadležno tijelo za zaštitu konkurencije Republike Crne Gore (Odluka broj: 02-UPI-27/23-13 od 27. novembra 2013. godine).

Nadležna tijela za zaštitu konkurencije Republike Srbije i Republike Hrvatske su uvjetno odobrila namjeravanu koncentraciju uz ispunjenje određenih uslova u obliku strukturnih mjera i ponašanja od strane Podnosioca prijave (Odluka broj: 6/0-02-466-/2013-199 od 25. decembra 2013. godine i Obavještenje zaprimljeno pod brojem: 05-26-1-14-331-II/13 dana 15.4.2014. godine).

Na osnovu preliminarne analize podataka iz dokumentacije dostavljene uz Prijavu i dopunu Prijave, a koji se odnose na broj maloprodajnih objekata učesnika koncentracije i glavnih konkurenata po gradovima na tržištu trgovine na malo prehrambenim proizvodima i robom široke potrošnje u Bosni i Hercegovini izvršenoj prema kriteriju površine maloprodajnog objekta u skladu sa važećim pravilnicima (Pravilnik o minimalno tehničkim uslovima u pogledu poslovnog prostora, opreme, uređaja i potrebne stručne spremljenosti poslovnih prostora za obavljanje trgovine i trgovinskih usluga („Službene novine Federacije BiH“, broj 49/12)), Konkurencijsko vijeće je ocijenilo da bi provođenje predmetne koncentracije moglo imati za posljedicu negativne efekte koji mogu značajno narušavati konkurenciju na relevantnom tržištu u pojedinim gradovima Bosne i Hercegovine.

Slijedom navedenog, Konkurencijsko vijeće je na 72. (sedamdesetdrugoj) sjednici održanoj dana 20.11.2013. godine donijelo Zaključak o pokretanju postupka ocjene koncentracije između privrednog subjekta Agrokor i privrednog subjekta Mercator d.d., u smislu člana 17. i 18. Zakona (broj: 05-26-1-14-22-II/13), iz razloga što bez provedenog postupka i u roku iz člana 18. tačka (6) Zakona nije moguće utvrditi i analizirati efekte predmetne koncentracije.

Tokom postupka radi utvrđivanja svih relevantnih činjenica, u smislu člana 35. stav (1) tačke a) i c) Zakona, Konkurencijsko vijeće je prikupljalo podatke i dokumentaciju i od drugih tijela /institucija /privrednih subjekata koje nisu stranke u postupku.

U tom smislu, Konkurencijsko vijeće je u toku postupka dana 21.11.2013. godine aktom broj: 05-26-1-014-28-II/13 uputilo 147 zahtjeva za dostavom podataka privrednim subjektima koje je Podnosilac prijave označio kao svoje konkurente na relevantnom tržištu. Naknadno, Konkurencijsko vijeće je dana

29.1.2014. godine aktima od broja: 05-26-1-014-163-II/13 do broja: 05-26-1-014-165-II/13, dana 30.1.2014. godine akt broj: 05-26-1-014-167-II/13, dana 3.2.2014. godine aktima od broja: 05-26-1-014-171-II/13 do broja: 05-26-1-014-175-II/13 te dana 21.2.2014. godine aktima od broja: 05-26-1-014-188-II/13 do broja: 05-26-1-014-190-II/13 uputilo dodatne zahtjeve za dostavom podataka i informacija.

Istovremeno, Konkurencijsko vijeće je prikupljalo podatke relevantne za ocjenu predmetne koncentracije od nadležnih institucija pa je dana 22.11.2013. godine aktom broj: 05-26-1-014-30-II/13 uputilo zahtjev za dostavom podataka Agenciji za statistiku BiH kojim su zatraženi podaci o ukupno ostvarenom prihodu u Bosni i Hercegovini u 2012. godini pojedinačno za tržište veleprodaje i tržište maloprodaje prehrambenim proizvodima i robom široke potrošnje. Traženi su također i podaci o ostvarenim ukupnim godišnjim prihodima na nivou određenih regija/katniona/općina.

Obzirom da Konkurencijsko vijeće nije u ostavljenom roku zaprimilo tražene podatke upućena je urgencija dana 18.12.2013. godine aktom broj: 05-26-1-014-147-II/13.

Konkurencijsko vijeće je dana 25.12.2013. godine putem e-maila zaprimilo djelimičnu dostavu traženih podataka (podnesak broj: 05-26-1-014-149-II/13) u kojem je istaknuto da Agencija raspolaže samo podacima koji se odnose na ukupno ostvarene godišnje prihode na tržištu veleprodaje i tržištu maloprodaje prehrambenim proizvodima i robom široke potrošnje ali isključivo na državnom nivou te su isti dostavljeni.

Dana 13.1.2014. godine aktom broj: 05-26-1-014-153-II/13 i aktom broj: 05-26-1-014-154-II/13 Konkurencijsko vijeće se obratilo Republičkom zavodu za statistiku RS i Federalnom zavodu za statistiku FBiH, a zatim i dana 16.1.2014. godine aktom broj: 05-26-1-014-155-II/13 i aktom broj: 05-26-1-014-156-II/13 Poreskoj upravi FBiH i Poreskoj upravi RS.

Predmetnim aktima zatraženi su podaci o ukupnom broju registrovanih maloprodajnih i veleprodajnih objekata – trgovina na malo ili veliko hranom, pićem i duhanskim proizvodima u nespecijaliziranim i specijaliziranim prodavnicama na području Republike Srpske i Federacije Bosne i Hercegovine te ukupnoj površini maloprodajnih i veleprodajnih objekata koje su registrovane za navedene djelatosti. Zatraženi su i podaci o ostvarenim ukupnim godišnjim prihodima privrednih subjekata u 2012. godini koji su registrovani za obavljanje djelatnosti – trgovina na malo u nespecijaliziranim prodavnicama – šifra djelatnosti 47.1 i 47.2.

Konkurencijsko vijeće je dana 21.1.2014. godine zaprimilo podnesak broj: 05-26-1-014-157-II/13 Republičkog zavoda za statistiku RS u kojem se navodi da je uspostavljanje i vođenje Registra poslovnih subjekata i Registra finansijskih izvještaja u nadležnosti Agencije za posredničke, informatičke i finansijske usluge Banja Luka te da je akt Konkurencijskog vijeća prosljeđen istom.

Dana 22.1.2014. godine Konkurencijsko vijeće je zaprimilo podnesak Poreske uprave RS broj: 05-26-1-014-160-II/13 u kojem se navodi da sa traženim podacima raspolaže Agencija za posredničke, informatičke i finansijske usluge Banja Luka.

Konkurencijsko vijeće je dana 21.1.2014. godine zaprimilo podnesak broj: 05-26-1-014-158-II/13 Federalnog zavoda za statistiku sa pregledom ukupnog broja registrovanih privrednih subjekata i jedinica prema šifri djelatnosti.

Poreska uprava FBiH je dana 03.02.2014. godine podneskom broj: 05-26-1-014-170-II/13 Konkurencijskom vijeću dostavila spisak poslovnih subjekata sa šifrom djelatnosti 47.1 i 47.2. sa poslovnim jedinicama te obavijestila Konkurencijsko vijeće da ne raspolaže svojim podacima o ukupnim godišnjim prihodima privrednih subjekata u 2012. godini te da Agencija za finansijske, informatičke i posredničke usluge FBiH raspolaže tim podacima.

Agencija za posredničke, informatičke i finansijske usluge Banja Luka je dana 11.2.2014. godine podneskom broj: 05-26-1-014-184-II/13 dostavila Konkurencijskom vijeću podatke o broju registrovanih poslovnih subjekta u Republici Srpskoj koji su razvrstani po djelatnostim i općinama.

Konkurencijsko vijeće je dana 18.2.2014. godine donijelo Zaključak o produženju roka za donošenje rješenja broj: 05-26-1-14-186-II/13, obzirom da je prema stanju spisa procijenilo da neće biti u mogućnosti donijeti konačno rješenje u roku od 3 mjeseca, kako je propisano članom 41. stav (1) tačka d) Zakona, jer je za utvrđivanje činjeničnog stanja i ocjenu dokaza bilo neophodno prikupiti dodatne podatke i izvršiti analize istih.

Konkurencijsko vijeće se dana 17.3.2014. godine aktima broj: 05-26-1-014-200-II/13 i broj: 05-26-1-014-201-II/13 obratilo Agenciji za posredničke, informatičke i finansijske usluge Banja Luka i Agenciji za finansijske, informatičke i posredničke usluge d.d. zahtjevom za dostavljanjem podataka o ukupnim godišnjim prihodima svih privrednih subjekata za 2012. godinu, koji obuhvataju sljedeće podatke: šifra djelatnosti 47.1, 47.2, 52.1 i 52.2 i opis djelatnosti, naziv privrednog subjekta, JIB, adresa i sjedište, općina/grad/kanton.

Analizirajući prikupljene podatke Poreske uprave FBiH Konkurencijsko vijeće je utvrdilo postojanje više privrednih subjekata u odnosu na podatke dostavljene u Prijavi (oko 180 privrednih subjekata), a koji posluju pod istom registrovanom šifrom djelatnosti kao i učesnici koncentracije te se odlučilo istim obratiti zahtjevima za dostavom podataka i informacija dana 31.3.2014. godine aktom broj: 05-26-1-014-209-II/13.

Zahtjevima za dostavom podataka koji su upućeni tržišnim konkurentima učesnika koncentracije traženi su podaci o ostvarenom ukupnom godišnjem prihodu u 2012. godini svakog konkretnog privrednog subjekta kao i podaci o vlastitoj maloprodajnoj i/ili veleprodajnoj mreži i to pojedinačni ukupni prihodi svakog prodajnog mjesta, površina prodajnog mjesta kao i podatak o distributivnoj mreži ukoliko je riječ o tržištu veleprodaje.

Agencija za finansijske, informatičke i posredničke usluge FBiH je dana 3.4.2014. godine dostavila tražene podatke podneskom broj: 05-26-1-014-231-II/13 kao i dana 4.4.2014. godine podneskom broj: 05-26-1-014-238-II/13

Agencija za posredničke, informatičke i finansijske usluge Banja Luka je dana 16.4.2014. godine dostavila tražene podatke podneskom broj: 05-26-1-014-342-II/13.

Uporednom analizom podataka o broju i vrsti maloprodajnih objekata konkurenata učesnika koncentracije, Konkurencijsko vijeće je utvrdilo da postoje odstupanja u podacima koje je dostavio Podnosilac prijave u odnosu na podatke do kojih je došlo Konkurencijsko vijeće analizom prikupljenih podataka provedene ankete među konkurentima učesnika koncentracije.

Konkurencijsko vijeće je dana 25.2.2014. godine na 81. sastanku Kolegija razmatralo činjenice i okolnosti vezane uz Prijavu koncentracije te je tom prilikom vršilo analizu i uporedbu podataka koje je Podnosilac prijave dostavio u Prijavi i dopunama Prijave koncentracije, podatke koje je Konkurencijsko vijeće prikupilo od drugih učesnika na analiziranim tržištima kao i podatke prikupljene od relevantnih institucija tokom provođenja predmetnog postupka.

U smislu provjere prikupljenih podataka Konkurencijsko vijeće je prije donošenja konačne odluke u predmetu ocjene dopuštenosti koncentracije dana 13.3.2014. godine aktom broj: 05-26-1-014-198-II/13 dostavilo Podnosiocu prijave preliminarnu analizu tržišta sa iskazanim odstupanjima u raspoloživim podacima, u svrhu očitovanja Podnosioca prijave na nalaze Konkurencijskog vijeća, u slučaju da smatra da rezultati koje pokazuje analiza tržišta ne odražavaju stvarno stanje po pitanju zastupljenosti objekata

učesnika koncentracije i glavnih tržišnih konkurenata, a da istovremeno sam Podnosilac prijave posjeduje egzaktnu i provjerljivu podatke i informacije kojima svoje navode može potkrijepiti.

Podnosilac prijave je dana 27.3.2014. godine podneskom broj: 05-26-1-014-207-II/13 dostavio Konkurencijskom vijeću pisano očitovanje na ranije dostavljenu preliminarnu analizu tržišta u kojem je ukazao na praksu Konkurencijskog vijeća u pogledu određivanja relevantnog tržišta kao i da korištenje kriterija formata prodajnih objekata predstavlja odstupanja od Odluke o utvrđivanju relevantnog tržišta, da ovakva podjela nije osnovana te da se posmatrani formati prodavnica mogu smatrati međusobno konkurentnim jer nema nikakvih regulatornih prepreka u pogledu zastupljnog asortimana i dodatnih usluga potrošačima.

U navedenom podnesku Podnosilac prijave također navodi i obrazlaže pojedina odstupanja u podacima dostavljenim Konkurencijskom vijeću tokom postupka i podataka koje je Konkurencijsko vijeće samostalno prikupilo od konkurenata učesnika koncentracije.

Podnosilac prijave se u podnesku zaprimljenom dana 3.04.2014. godine pod brojem: 05-26-1-014-232-II/13 dostavio popis prodajnih objekata konkurenata u posmatranim kategorijama za gradove Cazin, Lukavac, Mostar, Sarajevo, Sanski Most, Zenica i Živinice, a sve prema svojim najboljoj procjeni. Također, dostavljeni su podaci o prodajnim objektima učesnika koncentracije koji koriste po osnovu ugovora o zakupu sa detaljnim podacima o vremenskom periodu na koji su zaključeni. U skladu sa traženim, Podnosilac je dostavio i obrazloženje očekivanih pogodnosti koje će nastupiti usljed provođenja koncentracije za krajnje potrošače u smislu cijena, kvaliteta i izbora.

Konkurencijsko vijeće je izvršilo provjeru i analizu podataka dostavljenih dana 3.4.2014. godine pod brojem: 05-26-1-014-232-II/13, te je uzimajući u obzir iste, sačinilo prijedlog konačnog rješenja koji je razmatran na 84. (osamdesetčetvrtom) kolegiju Konkurencijskog vijeća održanom dana 29.4.2014. godine, nakon kojeg je održana i 88. (osamdesetosma) sjednica na kojoj je razmatran prijedlog zaključka o upućivanju na izjašnjenje Podnosiocu prijave Nacrta prijedloga rješenja po Prijavi predmetne koncentracije. Navedeni prijedlog zaključka je usvojen, te je dana 30.4.2014. godine nacrt prijedloga rješenja po Prijavi koncentracije dostavljen na očitovanje Podnosiocu prijave.

Podnosilac prijave se dana 7.5.2014. godine podneskom zaprimljenim pod brojem: 05-26-1-014-371-II/13 očitovao na nacrt prijedloga konačnog rješenja, u kom je istakao da smatra da se predmetnom koncentracijom ne stvara novi niti jača postojeći dominantni položaj, te da bi ista trebala biti odobrena bez postavljanja uslova, ali da ukoliko Konkurencijsko vijeće smatra da je postavljanje uslova neophodno, isti dostavlja prijedlog mjera.

Dostavljeno očitovanje je uzeto u obzir prilikom izrade prijedloga konačnog rješenja, koje je razmatrano na 90. (devedesetoj) sjednici Konkurencijskog vijeća, održanoj dana 13.5.2014. godine.

Prilikom razmatranja i glasanja po Prijedlogu rješenja nisu ispunjeni zakonski uslovi predviđeni članom 24. stav 2. Zakona, koji propisuje da se odluke Konkurencijskog vijeća donose većinom glasova prisutnih članova, s tim da za svaku odluku mora glasati najmanje po jedan član iz reda konstitutivnih naroda. Naime, ¹(..) člana Konkurencijskog vijeća su glasali za prijedlog rješenja, dok su (..) člana bila protiv. Iz navedenog proizilazi da Konkurencijsko vijeće nije moglo donijeti konačnu odluku.

Članom 41. stav (1) tačka d) Zakona je propisano da je nakon donošenja zaključka o pokretanju postupka Konkurencijsko vijeće dužno donijeti konačno rješenje u roku od tri mjeseca za utvrđivanje ocjene koncentracije iz člana 18. Zakona. Ako u roku iz stava (1) člana 41. Konkurencijsko vijeće ne donese konačno rješenje, u slučajevima kada ocijeni da je za utvrđivanje činjeničnog stanja i ocjenu dokaza

¹ (..) Podaci predstavljaju poslovnu tajnu

potrebno izvršiti dopunsko vještačenje ili analize, ili kada je riječ o osjetljivim privrednim granama ili tržištima, može produžiti rok za donošenje konačnog rješenja do tri mjeseca, o čemu je obavezno u pisanoj formi obavijestiti stranke u postupku.

Nadalje, članom 18. stav (7) Zakona propisano je da ukoliko Konkurencijsko vijeće ne donese rješenje u roku iz člana 41., smatra se da je koncentracija dopuštena.

Konkurencijsko vijeće je aktom broj: 05-26-1-014-372-II/13 od 20.5.2014. godine obavijestilo Podnosioca prijave da konačno rješenje u postupku nije doneseno iz razloga što se nisu ispunili zakonom propisani uslovi za njegovo donošenje, te je poučen o citiranim odredbama Zakona prema kojim usljed proteka roka nastupa zakonska pretpostavka o dopuštenosti koncentracije.

Na poseban zahtjev privrednog subjekta, Konkurencijsko vijeće u skladu sa članom 19. Odluke o načinu podnošenja prijave i kriterijima za ocjenu koncentracija privrednih subjekata donosi rješenje o dopuštenosti koncentracije.

Podnosilac prijave je podnio Konkurencijskom vijeću poseban Zahtjev za donošenje rješenja dana 20.5.2014. godine pod brojem: 05-26-1-014-373-II/13.

Postupajući po Zahtjevu za donošenje rješenja Podnosioca prijave, a imajući u vidu naprijed navedeno, Konkurencijsko vijeće je konstatovalo da je rok za donošenje konačnog rješenja u smislu člana 41. Zakona protekao, te je u skladu sa članom 19. Odluke o načinu podnošenja prijave i kriterijima za ocjenu koncentracije privrednih subjekata donijelo odluku kao u tački 1. dispozitiva ovog Rješenja.

Administrativna taksa

U skladu s članom 2. tarifni broj 107. stav (1) tačka h) Odluke o visini administrativnih taksi u vezi sa procesnim radnjama pred Konkurencijskim vijećem («Službeni glasnik BiH», broj 30/06 i 18/11) Podnosilac zahtjeva je na ovo Rješenje obavezan platiti administrativnu taksu u iznosu od 2.500,00 KM u korist Budžeta institucija Bosne i Hercegovine.

Pouka o pravnom lijeku

Protiv ovog Rješenja nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objave ovog Rješenja.

Predsjednik

Gordan Raspudić